

AKASHVANI (AIR)
RNU : KOLKATA
Bengali Text Bulletin

Date: 15.09.2024

Time: 7.35 A.M

বিশেষ বিশেষ খবর –

- ১) প্রধানমন্ত্রী নরেন্দ্র মোদী আজ ৬-টি নতুন বন্দেভারত এক্সপ্রেসের সূচনা করবেন। এর মধ্যে এরাজ্য পাচ্ছে তিনটি।
- ২) আর জি কর-এ কর্তব্যরত তরুণী চিকিৎসকের খুন ও ধর্ষণের ঘটনায় দেহিতে এফ আই আর করার ও প্রমাণ লোপাটের অভিযোগে ওই হাসপাতালের প্রাক্তন অধ্যক্ষ ডাক্তার সন্দীপ ঘোষ ও টালা থানার তৎকালীন ও সি অভিজিৎ মন্ডলকে গ্রেফতার করেছে সিবিআই।
- ৩) মুখ্যমন্ত্রী মমতা ব্যানার্জীর সঙ্গে গতকাল জুনিয়ার চিকিৎসকদের আলোচনা ভেস্টে গিয়েছে। অব্যাহত থাকছে ধর্না।
- ৪) রাজ্যের পশ্চিমাংশের জেলাগুলিতে আজ ভারী বৃষ্টির পূর্বাভাস দিয়েছে আলিপুর আবহাওয়া দফতর।
- ৫) আই এস এল ফুটবলে গতকাল ইস্টবেঙ্গল তাদের প্রথম ম্যাচে বেঙ্গালুরু এফ সি -র কাছে পরাজিত।

oooooooooooooooooooooooooooo

পশ্চিমবঙ্গ, আরো তিনটি নতুন বন্দে ভারত এক্সপ্রেস পেতে চলেছে। এগুলি হল ভাগলপুর-হাওড়া, গয়া-হাওড়া, রৌরকেল্লা-হাওড়া।

প্রধানমন্ত্রী নরেন্দ্র মোদী আজ ঝাড়খণ্ডের টাটানগরে মোট ৬ টি বন্দে ভারত এক্সপ্রেসের যাত্রার সূচনা করবেন। এর মধ্যে এ রাজ্যের জন্য রয়েছে এই তিনটি ট্রেন।

০০০০০০০০০০০০০০০০০০০০০

আর জি কর কাণ্ডে তরুণী চিকিৎসকের ধর্ষণ ও খুনের ঘটনায় সিবিআই ওই কলেজের প্রাক্তন অধ্যক্ষ সন্দীপ ঘোষ এবং টালা থানার তৎকালীন ওসি অভিজিৎ মন্ডলকে গতরাতে গ্রেফতার করেছে। তথ্য প্রমাণ লোপাট ও দেহিতে এফআইআর করার অভিযোগে এই দুজনকে গ্রেপ্তার করা হয়। আরজিকর কাণ্ডে দুর্নীতির অভিযোগে আগেই গ্রেপ্তার হন সন্দীপ ঘোষ।

উল্লেখ্য টালা থানার ওসি-কে সিবিআই এর আগে কয়েকবার জেরা করেছিল। গতকাল দুপুরে অভিজিৎ মন্ডল এবং ঘটনার দিন ডিউটি অফিসার ও মালখানার দায়িত্বপ্রাপ্তকে সিজিও কমপ্লেক্সে তলব করে সিবিআই। দীর্ঘক্ষণ জিজ্ঞাসাবাদের পর রাত সাড়ে নটা নাগাদ গ্রেপ্তার করা হয় অভিজিৎ মন্ডলকে। রাতেই বি আর সিং হাসপাতালে মেডিকেল টেস্টের পর তাকে সিজিও কমপ্লেক্সের নিয়ে যাওয়া হয়। আজ তাকে শিয়ালদা আদালতে হাজির করা হবে। সেই সঙ্গে সন্দীপ ঘোষকেও রিম্যান্ডে নেওয়ার আবেদন করা হবে।

উল্লেখ্য তরুণী চিকিৎসকের ধর্ষণ ও খুনের ঘটনায় এ পর্যন্ত তিনজনকে গ্রেপ্তার করা হলো।

বিজেপি, টালা থানার ওসির গ্রেফতারের ঘটনাকে স্বাগত জানিয়েছে। দলের রাজ্য সভাপতি সুকান্ত মজুমদার জানিয়েছেন, তিনি বে-আইনীভাবে সফ্রে বেলায় ময়না তদন্তের নির্দেশ দিয়েছিলেন।

সি পি আই এম-এর কেন্দ্রীয় কমিটির সদস্য সুজন চক্রবর্তী গ্রেফতারের ঘটনার প্রতিক্রিয়া জানাতে গিয়ে বলেন, রাজ্যের স্বাস্থ্য সচিব ও কলকাতার পুলিশ কমিশনার বিনীত গোয়েলকেও গ্রেফতার করতে হবে।

oooooooooooooooooooooooooooo

জুনিয়ার চিকিৎসক ও রাজ্য প্রশাসনের মধ্যে আলোচনা গত রাতেও ভেসে গিয়েছে। সকালে মুখ্যমন্ত্রী চিকিৎসকদের ধর্নায় হাজির হয়ে ফের বৈঠকে বসার অনুরোধ করেন। পরবর্তী উদ্যোগে সায় দিয়ে চিকিৎসকরা সন্ধ্যায় কালীঘাটে মুখ্যমন্ত্রীর বাসভবনে উপস্থিত হলেও শেষ পর্যন্ত বৈঠক করা যায়নি।

আমাদের প্রতিনিধির একটি প্রতিবেদন -

(ভয়েসকাস্ট - অভিরূপ)

oooooooooooooooooooooooooooo

স্বাস্থ্যভবনের সামনে জুনিয়ার চিকিৎসকদের অবস্থান স্থলে হামলার ছক কষার অভিযোগে ধৃত DYFI নেতা কলতান দাশগুপ্ত এবং যুবকর্মী সঞ্জীব দাসকে সাত দিনের পুলিশ হেফাজত দিয়েছে আদালত। গতকাল দুজনকেই পুলিশ বিধানগর আদালতে তোলে।

হামলার ছকের অডিও ক্লিপ ভাইরাল হওয়ার পরই এই নিয়ে তোলপাড় শুরু হয়। তদন্তে নেমে শুক্রবার হালতু থেকে সঞ্জীব দাস ওরফে বুবলাইকে পুলিশ গ্রেপ্তার করে। তাকে জিজ্ঞাসাবাদ করেই বাম যুবনেতা কলতানের নাম উঠে এসেছে বলে পুলিশের দাবী। এরপর গতকাল ভোরে লালবাজারের অদূরে ফিয়ার্স লেনে বাম কর্মী সমর্থকদের অবস্থান স্থল থেকে বাড়ি যাওয়ার পথে টালিগঞ্জ ফাঁড়ির কাছে কলতান এবং আরো এক CPIM নেতা সংগ্রাম চট্টোপাধ্যায়কে আটক করা হয়। জিজ্ঞাসাবাদের পর সংগ্রামকে ছেড়ে দেওয়া হলেও, কলতানকে পুলিশ গ্রেপ্তার করে।

উল্লেখ্য, তৃণমূল কংগ্রেস নেতা কুণাল ঘোষ এই অডিও ক্লিপটি প্রকাশ্যে আনেন। কলতানের গ্রেপ্তারের পরই বিধাননগর পুলিশ কমিশনারেটের ডিসি অনীশ

সরকার সাংবাদিক বৈঠক করে জানান, ভাইরাল ওই অডিও-র টেকনিক্যাল পরীক্ষা করা হয়েছে। এর সত্যতা নিয়ে কোনো সংশয় নেই।

এদিকে, কলতানের দাবী, তাঁর বিরুদ্ধে ষড়যন্ত্র হয়েছে। আসল আন্দোলন থেকে নজর ঘোরাতেই এই পদক্ষেপ বলে তাঁর দাবী।

○○○○○○○○○○○○○○○○○○○○○○○○○○○○○○

শহরে নাগরিক নিরাপত্তা ও সুরক্ষা সুনিশ্চিত করতে কলকাতা পুলিশ একটি মোবাইল অ্যাপ আনতে চলেছে। নারীশক্তি নামের এই অ্যাপের মাধ্যমে বিপদে পড়া নাগরিকরা প্যানিক বাটন টিপে সাহায্য চাইলে তা ভবানী ভবনের ইমার্জেন্সি রেসপন্স সার্ভিস সিস্টেম ও একশো ডায়ালের কন্ট্রোল রুমের মাধ্যমে পুলিশের কাছে পৌঁছবে। এরপরে বিপদে পড়া ব্যক্তির নাম, পরিচয় ও তার ভৌগলিক অবস্থান দেখে পুলিশ দ্রুত সেখানে পৌঁছবে বলে লালবাজার সূত্রে জানা গিয়েছে।

○○○○○○○○○○○○○○○○○○○○○○○○○○○○○○

আলিপুর আবহাওয়া দপ্তর জানিয়েছে, আজ থেকে বৃষ্টি কমবে দক্ষিণবঙ্গের জেলাগুলিতে। তবে পুরুলিয়া, ঝাড়গ্রাম, পশ্চিম বর্ধমান এবং বীরভূমে ভারী বৃষ্টি হতে পারে। বাকি জেলাগুলিতে ভারী বৃষ্টি সংক্রান্ত আর কোনও সতর্কতা জারি করা হয়নি।

নিম্নচাপের প্রভাবে সমুদ্র উত্তাল রয়েছে। আবহাওয়া দপ্তর জানিয়েছে, উত্তর বঙ্গোপসাগর এবং সংলগ্ন পশ্চিমবঙ্গ, ওড়িশা ও বাংলাদেশ উপকূলে আজ ঝোড়ো হাওয়া বইবে। হাওয়ার গতি বেগ থাকতে পারে ঘণ্টায় ৪৫ থেকে ৫৫ কিলোমিটার। মৎস্যজীবীদের সমুদ্রে যেতে নিষেধ করা হয়েছে।

নিম্নচাপ ও মৌসুমী অক্ষরেখার জোড়া ফলায় দুর্ঘোণের জেরে নাজেহাল দক্ষিণ ২৪ পরগনা জেলা সুন্দরবন এলাকায় বৃষ্টি ও ঝড়ের তীব্রতা বেশী। উপকূলবর্তী এলাকায় প্রচুর ক্ষয়ক্ষতি হয়েছে। ভেঙে পড়েছে কাঁচাবাড়ি, উপড়ে

পড়েছে গাছ ও বিদ্যুতের খুঁটি। অন্যদিকে পরিস্থিতি ঘোরালো হওয়ায় সুন্দরবন পুলিশ জেলার ফ্রেজারগঞ্জ ও সাগর থানার পক্ষ থেকে সতর্ক থাকার জন্য মাইকিং করা হচ্ছে। নদী ও সমুদ্রে নৌকা, ট্রলার নিয়ে মাছ ধরার ওপর নিষেধাজ্ঞা জারি আছে। প্রয়োজনে বাসিন্দাদের পাকা বাড়িতে আশ্রয় নিতে বলা হয়েছে। বকখালিতে সমুদ্র-স্নানে নিষেধ করে সমুদ্রতটে মাইকিং করেছে পুলিশ। প্রশাসনের পক্ষ থেকে প্রতিটি ব্লকে পর্যাপ্ত ত্রাণ মজুতের নির্দেশ দিয়েছে জেলা প্রশাসন। সেচ, বিদ্যুৎ, জনস্বাস্থ্য কারিগরি দপ্তরের আধিকারিক ও কর্মীদের ছুটি বাতিল করা হয়েছে।

০০০০০০০০০০০০০০০০০০০০

কলকাতার তালতলা থানার ব্লুম্যান স্ট্রীট ও এসএন ব্যানার্জী রোডের সংযোগস্থলে গতকাল দুপুরে বিস্ফোরণে এক ভবঘুরে আহত হয়েছেন। বাপি দাস নামে ঐ ব্যক্তি এসএন ব্যানার্জী রোডের ফুটপাথে থাকত বলে জানা গেছে। একটি প্লাস্টিকের বস্তায় বিস্ফোরক ছিল বলে মনে করা হচ্ছে। আহত অবস্থায় বাপি দাসকে NRS হাসপাতালে ভর্তি করা হয়েছে। ঘটনার পরপরই সংলগ্ন রাস্তা বন্ধ করে দেওয়া হয়। বম্ব ডিসপোসাল স্কোয়াড বস্তুটি পরীক্ষার পর রাস্তা খুলে দেয়। ফরেনসিক দল ঘটনাস্থলে গিয়ে নমুনা সংগ্রহ করে।।

০০০০০০০০০০০০০০০০০০০০

বিজেপি, কলকাতা শহরে বোমা বিস্ফোরণের ঘটনায় NIA তদন্তের দাবী জানিয়েছে। দলের রাজ্য সভাপতি সুকান্ত মজুমদার গতকাল কেন্দ্রীয় স্বরাষ্ট্র মন্ত্রীকে চিঠি লিখে অভিযোগ করেন যে, রাজ্যের নাগরিকদের নিরাপত্তা অত্যন্ত সঙ্কটে। অবিলম্বে NIA বা অন্য কোনো কেন্দ্রীয় তদন্ত সংস্থাকে দিয়ে তদন্ত করানোর জন্য শ্রী মজুমদার আবেদন জানিয়েছেন।

০০০০০০০০০০০০০০০০০০০০

কোচবিহারের বক্সিরহাটে নাবালিকা ধর্ষণে অভিযুক্ত এক ব্যক্তিকে গতকাল তুফানগঞ্জ মহকুমা আদালতে তোলা হলে, সচেতন নাগরিক মঞ্চ নামে একটি সংগঠন ও বিজেপির মহিলা মোর্চা, আদালতের সামনে ব্যাপক বিক্ষোভ দেখায়। সম্প্রতি, তুফানগঞ্জ দু-নম্বর ব্লকে এক স্কুলছাত্রীকে ধর্ষণের অভিযোগে পুলিশ, ইরশাদ আলি নামে এক যুবককে গ্রেপ্তার করে। গতকাল তার চারদিনের পুলিশ হেফাজত হয়েছে।

০০০০০০০০০০০০০০০০০০০০

রাষ্ট্রীয় পুষ্টি মাস উপলক্ষে ভারত সরকারের তথ্য ও সম্প্রচার মন্ত্রকের সেন্ট্রাল ব্যুরো অফ কমিউনিকেশন (CBC) ফিল্ড অফিস মেদিনীপুরের উদ্যোগে হাওড়ার শিবপুর পাবলিক লাইব্রেরি হলে গতকাল একটি অনুষ্ঠানের আয়োজন করা হয়। এর অংশ হিসাবে হিন্দুস্তানি শাস্ত্রীয় সঙ্গীতের উপর একটি অনলাইন স্ট্রিং ইন্সট্রুমেন্ট প্রতিযোগিতা, শিশুদের ভাল খাদ্যাভ্যাসের ওপর চিঠি লেখা এবং পুষ্টিকর খাদ্য গ্রহণের জন্য নানা উদ্ভাবনী ধারণার ওপর মায়েদের নিবন্ধ লেখা ইত্যাদি আয়োজিত হয়। বিশিষ্ট পুষ্টিবিদ সঞ্জিতা চ্যাটার্জী পুষ্টি সংক্রান্ত নানা বিষয়সহ বর্তমান সময়ে মানুষের খাদ্যাভ্যাস, স্বাস্থ্যের ওপর জীবনশৈলী ও মানসিক চাপ ইত্যাদির কুপ্রভাব নিয়ে তাঁর বক্তব্য পেশ অনুষ্ঠান শেষে পুরস্কার বিজয়ীদের সার্টিফিকেট, পুরস্কার এবং স্মারক দিয়ে সম্মানিত করেন সুদীপ্ত বিশ্বাস, ফিল্ড পাবলিসিটি অফিসার, সিবিসি মেদিনীপুর।

০০০০০০০০০০০০০০০০০০০০

পূর্ব রেলের শিয়ালদা ডিভিশনের দমদম-বারাসাত সেকশনে মধ্যমগ্রাম ও বিরটিরি মাঝে রি-গার্ডারিং কাজের জন্য আজ সকাল সাড়ে দশটা পর্যন্ত ডাউন লাইনে এবং সকাল সাড়ে আটটা পর্যন্ত আপ লাইনে ট্র্যাফিক ও পাওয়ার ব্লক

থাকবে। এজন্য আজ ৩৪ টি EMU লোকাল বাতিল থাকবে। এছাড়াও, আজ কয়েকটি ট্রেনের যাত্রা সংক্ষিপ্ত করা হবে।

০০০০০০০০০০০০০০০০০০০০

আসন্ন উৎসব মরশুমের জন্য কেনাকাটায় যাত্রীদের যাতায়াতের সুবিধার্থে মেট্রো রেল কয়েকটি শনি ও রবিবার অতিরিক্ত ট্রেন পরিষেবা দেওয়ার সিদ্ধান্ত নিয়েছে।

আগামী শনিবার ২১ সেপ্টেম্বর ২৩৪ টির পরিবর্তে ২৬২ টি এবং আগামী ২৮ সেপ্টেম্বর এবং ৫-ই অক্টোবর ২৩৪ টির পরিবর্তে ২৮৮ টি ট্রেন পরিষেবা দেওয়া হবে। একই ভাবে আজ ১৫ সেপ্টেম্বর, ২২, ২৯ সেপ্টেম্বর এবং ৬ অক্টোবর ১৩০ টির পরিবর্তে ১৯৬ টি ট্রেন পরিষেবা দেওয়া হবে বলে মেট্রো রেল সূত্রের খবর।

তবে এই অতিরিক্ত ট্রেন পরিষেবা দেওয়া হলেও চারটি শনিবারে প্রথম ও শেষ ট্রেন পরিষেবার সময় অপরিবর্তিত থাকবে। রবিবারের ক্ষেত্রে প্রথম ট্রেন পরিষেবার সময় অপরিবর্তিত থাকলেও কবি সুভাষ থেকে দক্ষিণেশ্বর পর্যন্ত শেষ পরিষেবা রাত ৯ টা ২৭ মিনিটের পরিবর্তে রাত সাড়ে ৯ টায় করা হয়েছে বলে মেট্রো রেল সূত্রের খবর।

০০০০০০০০০০০০০০০০০০০০

ব্যাঙ্গালুরুর কান্তিরাভা স্টেডিয়ামে গত সন্ধ্যায় এবারের আইএসএলে তাদের প্রথম ম্যাচে ইস্টবেঙ্গল , ব্যাঙ্গালুরু এফসির কাছে ০-১ গোলে পরাজিত হয়েছে। ম্যাচের ২৫ মিনিটে ভিনিথ ভেঙ্কটেশ ব্যাঙ্গালুরুর হয়ে জয়সূচক গোলটি করেন। ম্যাচের ৮৭ মিনিটে লালচুংনুংগা লাল কার্ড দেখলে ইস্টবেঙ্গল বাকি সময় ১০ জনে খেলে।

০০০০০০০০০০০০০০০০০০০০

০০০০০০০০০০০০০০০০০০০০

০০০০০০০০০০০০০০০০০০০০